

Suiaassuseqatiminnik atoqateqartartut allatulli meeravissiarthaarsinnaalernissaat siunertaralugu appariittut nalunaarsorneqartarneq pillugu inatsisip allanngortinnissaanik sulissuteqaqqullugit, Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Naaja Nathanielsenimit, Inuit Ataqatigiinneersumit aamma Justus Hansenimit, Demokraatineersumit saqqummiunneqartoq)

pillugu

Inatsisit Atortinneqarnerannut Ataatsimiititaliap

ISUMALIUTISSIISUTAA

Siunnersuutip aappassaaneerreqarnerani saqqummiunneqartoq

Inatsisit Atortinneqarnerannut Ataatsimiititaliap suliarininnermini ukuninnga inuttaqarpoq:

Inatsisartunut ilaasortaq Isak Hammond, Inuit Ataqatigiit, siulittaasoq

Inatsisartunut ilaasortaq Andreas Uldum, Demokraatineersoq, siulittaasup tullia

Inatsisartunut ilaasortaq Debora Kleist, Inuit Ataqatigiit

Inatsisartunut ilaasortaq Doris Jakosen, Siumut

Inatsisartunut ilaasortaq Anders Olsen, Siumut

UKA2010-mi ulloq 14. oktober 2010-mi siullermeerinerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Suiaassuseqatiminnik inooqatillit appariittut nalunaarsorneqarsimasut meeqqanik nunanit allaneersunit meeravissiarthaarnissamut ullumikkut katissisimallutik appariit piginnaatitaaffissa assinginik piginnaatitaaffeqalernissaat aalajangiassatut siunnersuummi siunertarinearpoq.

Inatsisartut siunnersuummik siullermeerinninnerat

Siullermeerinninnermi Inatsisartuni partiit tamarmik siunnersuut tapersorpaat.

Inuit ataasiakkaat atoqateqartarnermik qanoq ittumik ingerlatsissanerlutik namminneq aalajangiinnaassuseqartut aamma suiaassuseqatiminnik inooqatillit allatulli meeravissiarthaartinneqarsinnaassasut partiit ataatsimoorussamik isumaqarput.

Ataatsimiititaliap siunnersuummik suliarinninnera

Aappaariittut nalunaarsugaaneq pillugu inatsit atuuttoq 1989-imeersuuvoq (Inatsit nr. 372, 7/6/1989-imeersoq). Inatsit Nunatsinni 1996-imi atuutilersinneqarpoq. Meeravissartaartarneq pillugu inatsimmi maleruagassat aappaariittut nalunaarsorneqarsimasunut atuutinngitsoq inatsimmi allassimavoq. Aappaariittut nalunaarsorneqarsimasut taamaalillutik meeravissartaarnissamut piginnaatitaaffeqarsimanngillat.

Inatsit (Peqqussut nr. 375, 15/5/2009-immeersoq), aappaariittut nalunaarsorneqarsimasut aapparisamik qitornaannik meeravissartaarsinnaangortillugit 2009-mi allanngortinneqarpoq. Taamaattorli nunanit allaneersunit meeravissartaarsinnaaneq pineqanngilaq.

Aappaariittut nalunaarsugaaneq pillugu inatsisip (Inatsit nr. 537, 26/05/2010-meersoq) allannguutaa Folketingip maj 2010-mi akuersissutigaa. Aappaariittut nalunaarsorneqarsimasut meeravissartaarsinnaanerannut ullumikkut killilersuutaasut inatsisikkut matumuunakkut atorunnaarsinneqarput. Tamatuma kingorna meeravissartaartarneq eqqarsaatigalugu aappaariittut nalunaarsukkat aamma aappaariittut katissimasut naligiissitaalerput. Inatsisip allannguuta taanna Kalaallit Nunaannut atuutilersinneqarsinnaavoq. Taamaattorli tamanna sulii pinngilaq.

Aalajangigassatut siunnersuut taanna saqqummiunneqartoq akuersissutigineqarpat aappaariinnik nalunaarsuisarneq pillugu danskit inatsisaata 2010-meersup allannguutai siuliani taaneqartut pissusissamisoortumik tassani naleqqussartariallit naleqqussarlugit Kalaallit Nunaanni atuutilersinneqarnissaanik Naalagaaffik qinnuigineqassasoq Naalakkersuisut peqquneqassapput.

Suiaassuseqartiminnik inooqatillit allatulli angajoqqaatut piginnaaneqarnerannik aamma toqqissisimanermik pitsaasumillu peroriartornissamik tunniussisinnaassuseqarnerannik ilaatigut siunnersuuteqartup Naalakkersuisullu isumaannut ataatsimiitsitaliaq isumaqataavoq.

Aappaariittut nalunaarsorneqarsimasut meeravissartaarsimasut nunat allat ilaannit meeqqanik pissarsisarnermut atatillugu ajornartorsiutinik pilersitsisarsimanagerat Naalakkersuisut akissuteqaataatigut siusinnerusukkat saqqummiunneqarsimavoq. Taamaattumik Naalakkersuisut akissuteqaamminni taasaatut nunani (ilaatigut Islandimi, Tuluut Nunaanni aamma Sverigemi) aappaariittut nalunaarsorneqarsimasut 2003-miilli meeravissartaarnissamut periarfissaqarsimasut meeravissartaarsinnaanginnerat pillugu nunat pingajuussut piunasaqaateqarsimannginnerat ataatsimiititaliap ajunngilluinnartutut isigaa.

Taamatuttaaq meeravissartaarsinnaatitaanermut atatillugu aappaariittut nalunaarsorneqarsimasut aappaariinnut nalinginnaasunut naligiissinneqarnerat erseqqissumik taaneqanngimmat tamannalu siunnersuummi naammaginartumik erseqqarissumik saqqummiunneqarsimanngitsoq ataatsimiititaliaq isumaqarpoq.

Ataatsimiititaliap inassuteqaataa:

Siuliani allassimasut tunngavigalugit **allannguutissatut siunnersuut** manna ataatsimiititaliap isumaqatigiittup saqqummiuppaa:

Aappariittut nalunaarsorneqarsimasut allatulli meeravissiarthaarsinnaalernissaat siunertaralugu appariittut nalunaarsorneqartarneq pillugu inatsisip allanngortinnissaanik sulissuteqaqqullugit, Naalakkersuisut danskit naalagaaffiannut saaffiginninnissamik peqquneqassasut Inatsisartut aalajangiiffigisassaattut siunnersuut.

Allannguutissatut siunnersuut akuersissutigineqassasoq ataatsimiititaliap isumaqatigiittup inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.



Isak Hammond,
Siulittaasoq




Andreas Uldum



Debora Kleist



Doris Jakobsen



Anders Olsen